

von Wulf Wager

Penis-Pilla



Es geit jo wenig, über was d' Schwoba (zumal die auf de pietistische Fildra) weniger schwätzt als über d' Sexualität. Obwohl des Thema dauernd rings um ons isch, schwätzt mr net gern driebr. So wie seller 85-jährige. Der isch zu seim Doktr ganga ond hot klagt: "Meine Stamm-tischkamerade sagat, sie hät-tat no jede Woch oimol Sex. Was ka i do macha?" Dodruf

dr Ratschlag vom Doktr: "Ha, no sagat se 's halt au!"

Aber es geit jo Hilfsmittel für dysfunktionale Erektionsstörung – welche wo helfat, ond welche, wo bloß dene helfat, dia se vrkaufat.

Die Verbraucherzentrale Baden-Württemberg hot jetzt mitteilt, dass en der letschta Zeit o'bestellte Lieferonga vom Wundermittel für Penisverlängerong bei etliche Schwobamänner eitroffa. 187 Euro koschtet des, ond des Wundermittel mit dem geniala Titel "HorsePower+" verspricht a Verlängerong vom beschta Stück von "vier bis acht Zentimetern in nur wenigen Tagen"! Ha, Heidawetter! Des Beschte aber isch, dass etliche "Kunden" des au im Abonnement kriegat sollat, obwohl die einmalige Verlängerong a Leba lang halta soll. Stelat se sich a mol vor, wie des aussieht, wenn äll paar Dag des Deng vier bis acht Zentimeter länger wird!! Ha no, no ka'sch halt em Sommer koine kurze Hosa me a'zieha. Aber Sommer hemmr jo grad eh koin...

Bis näggschd Woch

Ihr

Alle Kolumnen zum Nachlesen unter www.woascht.de